

Khlěba kusk za khudeho
Nam we włóžach narosće.

„Džens naš wšědny khlěb daj nam!“
Tež my Boha prosymy;
Duž tym bėdnym prošerjam
Bože dary wudžělmy.

Na to wozny* džěćatko
Skibku khlěba wotkranu:
„Na, maš! wbohi prošerjo;
My 'šće mamy pokrutu.“

(W juniju 1847.)

* Dialektiscey za: WZA.



Njetrěbna starosć.

(Tydž. Now. 1847, 144.)

Hlós: Štoha či naši tež džělaja.

„**H**aloza, lisćičko zelene,
Podaj mi jablučko čerwjene,
Jablučko žolte a čerwjene.“

Haloza, lisćičko hnuwa so,
Dele so kuliło jablučko,
Jablučko rjane, kaž holičo.

Holičo jablučko spopadže,
Pěknemu hólčikej dawaše;
Woběmaj ličko so barbješe.